

Kalaallit Nunaanni pinerluttulerinermi inatsisip allanngortinneqarnera pillugu siunnersuummut missingiut pillugu Namminersorlutik Oqartussat akuersissuteqarnissaat pillugu inatsisartut aalajangiiffigisassaattut siunnersuut (Illoqarfimmi illuliorfiusimasumi illuinnarsuutinik eqqunngitsumik iginnerup pinerluutinngortinneqarnera, takunnissimasunik illersuinerup annertusinera, inip nakkutilliiffiusup atorneranut piumasaqaatinik iluarsineq il.il.)

pillugu

Inatsisinut Ataatsimiititaliap

siunnersuutip aappassaaneerreqarneranut

ISUMALIUTISSIISSUTAA

Inatsisinut Ataatsimiititaliap suliarinninnermini ilaasortarai

Inatsisartunut ilaasortaq Anders Olsen, Siumut, Siulittaasoq
Inatsisartunut ilaasortaq Sofia Geisler, Inuit Ataqtigiit, Siulittaasup tullia
Inatsisartunut ilaasortaq Aleqa Hammond, Nunatta Qitornai
Inatsisartunut ilaasortaq Anna Wangenheim, Demokraatit
Inatsisartunut ilaasortaq Stine Egede, Inuit Ataqtigiit

UKA2019-imi ulloq 8. oktober 2019-imi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisai siunertaalu

Pinerluttulerinermi inatsisip tallimanik pingaarnertut imaqtumik allanngortinneqarnera siunnersuutip nassatarissavaa:

1. Illoqarfimmi illuliorfiusimasuni aallaasinik igittarnermut malittarisassat pinerluttulerinermi inatsimmut ilanngutsinneqassapput. Taakku maannamut politiinit ileqqoreqqusani allassimasuugaluarput, unioqqutitsinermi taamaallaat akiliisitaatitsinermik pineqaatissiisoqarsinnaanera tamatumaa nassatarissimavaa.

2. Takunnissimallutik uppersaasuumik nalinginnaasumik siorasaarinerit pinerluttunngortinneqassapput. Kalaallit Nunaanni Eqqartuussiveqarnermut Ataatsimiititaliarsuup Kalaallit Nunaanni ikiaroorartunik atuiffiusuni peqqarniitsumik pissusilertoqartarnerata siaruaakkiartornera tunngavigalugu tamanna kaammattuutigisimavaa. Siorasaarutitik atuisarnermut tunngatillugu inatsimmi arlalinnik aalajangersagaqareerpoq, aalajangersagarli nutaaq aalajangersagaareersunut tapertaalissaaq.
3. Inissiisarfirmmut nakkutigineqarnissamullu pineqaatissiinissamut periarfissap qaammatinut pingasuniit qaammatinut arfinilinnut sivitsorneqarnissaa. Tamatumunnga tunngaviuvoq najukkami eqqartuussisut sulianik nalaataqartarnerat inissiisarfirmmeeriarluni nakkutigineqarnissamut pineqaatissiinnaaneq tulluartinneqartarluni, inissiisarfirmulli pineqaatissiinerup qaammatinut pingasunik minnerpaaffilerneqarsimanera pineqaatissiissutip taassuma atorneqarsinnaaneramik ajornartitsisararluni.
4. Inip nakkutilliiffiusup atorneranut piumasaqaatit sakkukillineqarput. Pingaartumik inissiisarfirmiittoq nipiliorpallaartillugu, aserorteritillugu imaluunniit assigisaanik sakkortuumik pissusilersortillugu inissinneqarsimasoq suli inissinneqarsimasut allat torsuusaanniimmat pequttallu innarlitsaalillugit paagusersugaaffiginngisaanni inimiimmat annikinnerusumik akuleruffiginnilluni pineqaatissiinerit naammaneq ajortut paasinarsisimavoq. Danskit pillaatissiissummik naammassinnittarneq pillugu inatsisaanni § 64-i malillugu malittarisassatigut piumasaqaatit, pinerluttulerinermillu inatsisip 2010-mi allanngortinnera sioqqullugu Kalaallit nunaannut atuuttut assinginik inimik nakkutilliiffiusumik atuisinnaanermut piumasaqaateqalernerani siunnersuutip nassataraa.
5. Tarnikkut nappaatillit pineqaatissinneqartarnerannik isumaginnittoqarfiup naammassineqartussaanaera erseqqissaatigineqarpoq. Peqqinnissaqarfiup imaluunniit isumaginnittoqarfiup akornanni aningaasartuutitik atuisussaataitasup sorliunera aalajangersakkami oqaasertaliineq atuuttoq malillugu nalornissutaalersimanera tamatumunnga tunngaviuvoq, tassami oqaasertaliinermi peqqinnissaqarfik kisimi taaneqarsimammat.

Inatsisartuni siunnersuummik siullermeerinnineq

Immikkoortumik siullermeerinninnermi nalinginnaasumik siunnersuummut tapersiisoqarpoq. Taamaattorli oqaluuserinninnermi nutserneqarnerani kukkuneqarnera uparuarneqarpoq.

Tamanna tunngavigalugu Naalackersuisut Inatsisissatut siunnersuutip kalaallisoortaanik iluarsisutitalimmik eqikkarneqarneranillu allakkatigut 21. oktober 2019-imi ullulerneqarsimasutigut kiisalu allakkatigut 13. november 2019-imeersutigut nassiussaqarput. Nutserneqarneranut iluarsisut kingullermik nassiunneqartoq isumaliutissiisummut ilanngussaq 1-itut ilanngunneqarpoq.

Ataatsimiititaliap siunnersuummik suliarinninnera

Illoqarfimmi illuliorfiusimasumi aallaasinik iginneq pillugu aalajangersakkat pinerluttulerinermi inatsimmut ilanngutsinneqarnerat pillugu:

Illuliorfiusimasuni aallaammik iginneq ullumikkut namminerisaminik pilernuttulerinermi inatsimmik unioqqutitsinerunngilaq. Aallaammik iginneq pinerluttulerinermi inatsimmik unioqqutitsinerup (assersuutigalugu toqutsinerup, ujajaanerup, siorasaarinerup imaluunniit piaaraluni ulorianartorsiortitsinerup) ilaatut pinngippat, pisoq ullumikkut taamaallaat kommunini politiit ileqqoreqqusaannik unioqqutitsinerussaaq. Unioqqutitsineq taamaattoq aallaavittut 3.000 kr.-inik akiligassiisoqarneratigut pineqaatissiissusiivusarpoq. Tamatuma saniatigut sakkumik arsaarinnissinnaanermut politiit peqqussutaat periarfissiivoq, unioqqutitsinerilli peqqarniilluinnartut pineqartinnagit politiit peqqussutaat malillugu arsaarinninnissaq tunuarsimaarfigineqarpoq.

Illuliorfiusimasuni aallammik iginneq pillugu aalajangersakkamik pinerluttulerinermi inatsimmut ilanngussinikkut eqqartuussiviit, ilaatigut unioqqutitsinerup peqqarniissusia ilaatigullu pinerluttup inuttut atugai tunngavigalugit pineqaatissiissutissamik toqqaaniarnerminni pituttugaannginnerulissapput.

Aammattaaq sakkumik atorneqartumik arsaarinnissinnaanerup atorneqartarnerata siaruaasimanerulerneranik tamanna nassataqarsinnaavoq. Oqaatigisariaqarporli sakkoq pineqartoq pinerluttup inatsisit naapertorlugit inuussutissarsiorneranut pingaaruteqarluinnarpat pinerluttulerinermi inatsimmi §166 imm. 3 malillugu pissutsinik immikkorluinnaq ittunik tamatumunnga tunngavissaqartinnagu arsaarinnittoqarsinnaanngilaq.

Inatsisissatut siunnersuummut nassuiaatini nalinginnaasuni allassimavoq, Kalaallit Nunaanni ukiumut arlaleriarluni inunnik puffassimaartunik imaluunniit aalakoornartumik sunnersimaneqarsimasunik illoqarfimmi illuliorfiusimasuni eqqarluni aallaasersortoqartartoq, tamannalu sumiiffimmi assut toqqissisimannginnermik pilersitsisartoq, tamannalu politiit, ambulance't qatserisartullu orniguttariaqartarmata inuiaqatigiinnut annertuumik aningaasartuutaasarluni.

Tamatumunnga ilanngullugu Inatsisinut Ataatsimiititaliamit oqaatigineqarsinnaavoq aallaasorsorfiusunut ornigunneq politiinut (kiisalu annaassiniaasartunut qatserisartunullu) orniguttunut tarnikkut ilungersunartumik artukkersuutaasinnaammat. Tassunga atatillugu nalunaarusiamik Det Nationale Forsknings- og Analysecenter for Velfærdimit (VIVE) suliarineqarsimasumik, ukioq manna marsip aallartinnerani saqqummiunneqartumik Inatsisinut Ataatsimiititaliaq maluginiaaqqusissaaq. Kalaallit Nunaanni politiit danmarkimi atuuttunut sanilliullutik amerlanerungaartut tarnikkut ilungersuuteqarlutik qisuariaateqartartut nalunaarusiamit takutinneqarpoq.

Aammattaq ataatsimiititaliaq Kalaallit Nunaanni Eqqartuussiveqarneq pillugu Ataatsimiititaliarsuup suliniuteqarneratigut 1997-imi politiit sulinerminni atugaat pillugit misissuisimanermut ("Politiets arbejdsvilkår i Grønland" 1997) innersuussisinnaavoq. Ilaatigut Kalaallit Nunaanni politiit sulinerminni Danmarkimi politiinut sanilliullutit pisunik ilungersunartunik nalaataqartarnermikkut annertunerungaartumik tarnimikkut nammakkersorneqartartut misissuinermi inernilunneqarpoq.

Taamaalillutik Danmarkimi politiit sisamararterutaasa pingasorarterutaasalu akornannik amerlassusillit ukiumi kingullermi pisunik ilungersunartunik ataasiarlutik arlaleriarlutilluunniit nalaataqarsimasarput, tamanna Kalaallit Nunaanni politiit tamarluinnarmik ukiup kingulliup ingerlanerani pisunik ilungersunartunik ataasiarlutik arlaleriarlutilluunniit nalaataqartarsimallutik nalunaarutigigaat.

1997-imi misissuisimanerup aamma takutippaa pisut ilungersunartut politiit sulinnigiffeqarnerminni inuunerannut sunniuteqartartut, ilaatigut nalinginnaanngitsumik nikallungasarnermik sinissaaruttarnermillu nassataqartartunik. Aamma qangaammali pisimasut politiit ilaannut amerlasuunut suli kinguneqarnerlutsitsisarsimasut.

Inatsisinut Ataatsimiititaliaq siusinnerusukkut politiinit paasissutissamik, piffissami 2009-miit 2013-ip tungaanut illoqarfimmi illuliortiterfiusimasumi 144-riarluni aallaammik igittoqartarsimaneranik takutitsisunik pissarsiaqarsimavoq.

Aallaammik igittoqartarneranut pissutaakulaarnerpaasut ilaatigut makkuupput:

- Toqutsineq: suliat inuup qimmiminik toqutsineranut tunngassutillit uani pineqarput. Tamatuma pisarnerata qimmeqarfiusuni akulikinnerunera ilimagineqarpoq.
- Aallartorneq: Ajutoornikkut uumassusilimmik eqquisumik iginneq.
- Imminut toqunnissamik siorasaarinerit: amerlasuutigut suliat inummut angerlarsimaffimmini pallittaalisitsisumut aallaammillu imminut toqunnissamik siorasaarisumut tunngasuusarput.

- eqqaasarneq: taamak nalilerneqartut assersuutigalugu suliat illoqarfiup ungataani aallaasiminnik nakersaasunut tunngassuteqarsinnaapput.
- Aallaasersorneq: Uani suliat angerlarsimaffimmi eqqissiviilliornermut politiit aggersagaanerannik aallartikkajuttut pineqarput, inuup allaammik sumut tamaanga eqqaassineranik kinguneqartartut, tamanna inuiaqatigiit akornanni ernumanerujussuarmik pilersitsisarpoq pingaartumik aallaasorsorfiusup qanitaani.

Suliani nalunaarutigineqartuni 114-iusuni eqqaaneqartuni ilaat suliat 37-iusut "aallaasersornertut" nalilerneqarput. Taakku suliat suliallu imminut toqunnissamik siorasaarinermut tunngassuteqartut suliani najugaqarfiusuni aallaasersornermut tunngassuteqartuni politiit peqqussutaat malillugu unioqqutitsinertut ilungersunarnerusutut politiinit nalilerneqarput. Suliani "aallaasersornermut" tunngassuteqartuni taakkunani pinerluttoq amerlasuutigut imigassamik aalakoornartortalimmik sunnerneqarsimasartoq nalunaarsuiffimmi takuneqarsinnaavoq. Taamaalilluni suliat "aallaasersornermut" tunngassuteqartut ilaanni 21-ini pinerluttoq aalakoornartumik sunnerneqarsimasarpoq, taakku suliani amerlanerpaasimapput kiisalu suliani "imminut toqunnissamik siorasaarinermut" tunngassuteqartuni katillugit 15-iusut ilaanni aqqaneq marluusuni. Nalunaarutiginninnermik suliat "aallaasersornertut" naliliivigineqartut ilaanni pinerluttup aalakoornartumik sunnersimaneqarnera paasissutissiissutigineqarneq ajortoq tamatuma saniatigut oqaatigineqassaaq. Suliat "aallaasersornermut" tunngassuteqartut akornanni pinerluttumut aalakoornartumik sunnerneqarsimasumut tunngassuteqartut amerlanerusinnaapput.

Inatsisinut Ataatsimiititaliaq ajornartorsiutip qanoq annertutigineru qanorlu ittoorpiarnera pillugu nutaanerusunik kisitsisaateqanngilaq.

Ataatsimiititaliaq isumaqarpoq (soorlu tamanna aamma ataatsimiititaliaq UKA 2013/74-imut isumaliutissiissummini erseqqissaatigisimagaa) siunnersuutip qanoq annertutigisumik pissusilersuutinik allanngortitsisinaanera, kiisalu suliat najugaqarfimmi aallaasersornermut tunngassuteqartut tamatuma malittuanik ikilinissaat qularnartutut isigineqartariaqartoq (tassa nalinginnaasumik anusinngorsaatiut atorneqarsinaanera qularnartoq). Unioqqutitsinerit taakku, aalakoornartumik sunnersimaneqartumit kamarujussuarmilluunniit amerlasuutigut unioqqutitsinerusarput, pinerluttup unioqqutitsinerup pinerluttulerinermi inatsisip ataaniinnera taamatullu akiliisinneqarnermik allaanerumik pineqaatissinneqarsinnaanermik kinguneqarsinnaanerannik peqquteqartumik pinerluuteqanngissinnaanera ilimananani.

Taamaammat Inatsisinut Ataatsimiititaliaq siunnersuummik pitsaasutut naliliisimanera siunnersuutip immikkut pinaveersaartitsissutitut atugassaqqissuuneranut atatillugu isiginiarneqassaaq (tassa inuit pineqaatissinneqartut pissusilersuutiminnik allannguinerannik

siunnersuutip nassataqarsinnaanera isiginiarlugu), tak. kinguliani Inatsisinut Ataatsimiititaliap UKA 2013/74-imut isumaliutissiissutaanit issuaq:

”Politiit peqqussutaat malillugu unioqqutitsinerit, pinerluttulerinermi inatsisip ataanut inissinneqarnissaannut tunngatillugu [...] tamanna pitsaasuusutut nalilerneqarpoq, taamaaliornikkullu ilaatigut piumasagaatitalerlugu pineqaatissiisinaanissamut eqqartuussivik periarfissinneqarpoq. Taamaalilluni “suliani aallaasersornermut tunngassuteqartuni” amerlasuuni pinerluttoq qulaani oqaatigineqartutut aalakoornartumik sunnerneqarsimasarmat, imigassamik atornerluutinut katsorsarneqarnissamik piumasagaatitalerlugu nakkutigineqarnissamut pineqaatissiinissamut eqqartuussiviup periarfissinneqarnera iluaqutaasinnaavoq. Akiliisitsinermik pineqaatissiinermut naleqqiullugu taamatut pineqaatissiinerup pinerluttup pinerluuteqaqqinnissaa ilimanannginnersissinnaavaa.”

Taamaalilluni inooqatinut pissusilersornermik pitsanngorsaataasinnaasunik pineqaatissiinissamik eqqartuussiviit toqqaasinnaaneranik siunnersuutip periarfissiinera Inatsisinut ataatsimiititaliap 2013-imi isumaliutissiisummini aalajangiisuusutut pingaartissimavaa, taamaalilluni pineqaatissiissut sapinngisamik inuiaqatigiit toqqissisimanissaannut ilapittuutaalluni.

Tamanna suli Inatsisinut Ataatsimiititaliamit aalajangiisuusumik pingaartinneqarpoq.

Inatsisissatut siunnersuutip immikkoortuanut tassunga tunngatillugu oqaasseqaatit allat:
Inatsisinut Ataatsimiititaliap maluginiarpa Naalakkersuisut november 2013-imi Inatsisartunit peqquneqarsimasut ”*Inunnik najugaqarfigineqartuni aallaasersornerit Kalaallit Nunaani pinerluttulerinermik inatsisip ataani inissisimalersinneqarnissaat, tamatumani inatsisip unioqqutinneqarnerini pineqaatissiisalnissat aammalu aallasersornermi aallaasit atorneqartut arsaarinnissutigineqartalernissaanik [...] Danmarkip Naalagaaffianik isumaqatiginninniarnissamik aallarniinissaaqqullugit*” (UKA 2013/74).

Inatsisartut kissaataat inatsisissatut siunnersuummik matuminnga naapertorniarneqarpoq, tamannalu Inatsisinut ataatsimiititaliamit nuannaarutigineqarpoq.

Taamaattorli Inatsisinut Ataatsimiititaliap oqaatiginngitsoorumanngilaa, Inatsisartut aalajangiinerannik atuutilersitsiniarneq ukiunit arfinilinnit sivisunerusimammat, tamanna naak

piffissami tassani pinerluttulerinermi inatsisip allannguutissaatut inatsisissatut siunnersuutininik arlaqartunik saqqummiussisoqartarsimagaluartoq. Tamanna *isumaqalersitsinissaavoq*, pinerluttulerinermi inatsimmi allannguutissanit Inatsisartunit Naalakkersuisunut sulissutigeqqullugit peqqussutigineqartunit allannguutit allat Naalakkersuisunit pingaartinneqarnerusimasut. Inatsisinut Ataatsimiititaliamit neriuutigaa taamaattoqanngitsoq. Naalakkersuisut iliuusissanik Inatsisartunit kissaatiginartinneqartunik tunniusimasumik pimoorussillutik sulissutiginnittarnerat ataatsimiititaliamit erseqqilluinnartumik naatsorsuutigineqarpoq.

Tassunga tunngatillugu ataatsimiititaliap eqqaasitsissutigissavaa, Inatsisartut 2012-imi upernaakkut ataatsimiinneranni aalajangiinerup Inatsisartunit *isumaqatigiittunit* akuersissutigineqartup atuutsilersinneqarnissaa suli ataatsimiititaliamit utaqqineqarmat (UPA 2012/134: Nunatsinni inuiaqatigiinnik kiffartuussinerup tiimit eqqartuussummut utaqqisitaasumut piumasaaqaatit 240 timiniik 300 timinut annertunerpaaffianik annertusinissaa anguniarlugu Naalakkersuisut Danmarkimi Justitsministerimut saaffiginneqqullugit peqquneqarnissaannik Inatsisartut aalajangiiffigisassaattut siunnersuut).

Takunnissimasunik nalinginnaasumik siorasaarinerit pinerluutinngortinneqarnissaannut tunngatillugu:

Aalajangiiffigisassatut siunnersuummi ima allassimasoqarpoq:

”Aamma Kalaallit Nunaanni takunnissimasut unnerluutigineqartumut inatsisitigut illersugaannginnertik pissutigalugu sassarnissartik qunugisarmassuk, takunnissimasunik nalinginnaasumik siorasaarinerit pinerluutinngortinneqarnissaat inatsisissatut siunnersuutip aappaattut siunertarivaa.”

Nassuiaatini immikkoortumi; ”2.2.2. Inatsisunik atuutsitsinermi ministeriaqarfiup eqqarsaatersuutai aaqqissuussinertullu siunnersuutigineqartoq”- mi ima allassimasoqarpoq:

”Kalaallit Nunaanni Eqqartuussivinnut Siunnersuisoqatigiit kaammattuutigisimavaat takunnissimasunik sioorasaarinerit naleqqiullugu Kalaallit Nunaanni inatsisitigut inissisimaneq pillaasarnermi inatsimmi § 123 malillugu inatsisitigut inissisimanermut naapertuuttunngortinneqassasoq, ilaatigut pissutigalugu Kalaallit Nunaanni ikiaroornartunik ingerlataqartuni nalinginnaasumik naakkittaalliisarnerit pisartut, ilaatigut pinerluttunut inupilunnet assersuunneqarsinnaasumik.”

Ikiaroornartunik ingerlataqartut akornanni nalinginnaasumik naakkittaalliisarnerit

peqqarniillisimanerisa ilumoornera ataatsimiititaliamit assortorneqanngilaq, tamatumunngali uppersaataasinnaasunik ataatsimiititaliaq takusaqarsimanngilaq. Taamaattoqarneranerup kisitsisitigut paasissutissanik tapertaqartinneqannginnera ataatsimiititaliamit iluanngitsutut nalilerneqarpoq.

Ininik nakkutilliiffiusunik atuisarnej pillugu:

Siunnersuutip tusarniaassutigineqarneranut atatillugu Inuit Pisinnaatitaaffiit Ilisimatusarfimmit kaammattuutigineqarpoq 'inatsisip allanngortinneranut peqatigitillugu isertitsivinni (inissiisarfinni) init nakkutilliiffiusut atorineqarnerannut atugassarititat tunngavissallu aalajangersimaqqissaartut nalunaarummi ilanngunneqarnissaat Justitsministeeriaqarfiup qulakkiissagaa'.

Tusarniaaneq pillugu ilanngussami ima oqaaseqarfigineqarpoq:

"Pinerluttulerinermut inatsimmi § 223 a, imm. 1-mi aalajangersagaq siunnersuutigineqartoq naapertorlugu Kalaallit Nunaanni Pinerluttunik isumaginnittut isertitsivii aalajangersimasut ileqqorissaarnissaq isumannaatsuunissarlu tunngavigalugit isertitsivimmiittussanngortitamik isersimaartarfimmut imaluunniit isertitsivinni inini nakkutilliiffiusuni inissiigallarsinnaapput.

Siunnersuutigineqartumi imm. 2 naapertorlugu Kalaallit Nunaanni Pinerluttunik Isumaginnittuni aqutsisut isertitsivimmiittussanngortitat najugaqarneri pillugit imm. 1 naapertorlugu maleruagassiussapput, matumani isertitsivinni init nakkutilliiffiusut atorineqarnissaat akuerineqarnissaallu ilanngullugit.

Pinerluttulerinermut inatsimmi § 223 a naapertorlugu inissiisarnej pillugu nalunaarummik, inatsisip atuutilerneranut peqatigitillugu, saqqummiussisoqarnissaa naatsorsuutigineqartoq Kalaallit Nunaanni Pinerluttunik Isumaginnittut ilisimatitsissutigaat."

Kalaallit Nunaanni Pinerluuteqarsimasunik Isumaginnittoqarfimmit oqaaseqaatit ataatsimiititaliamit toqqissisimanartinneqarput, tassami Inuit Pisinnaatitaaffiit Ilisimatusarfik assigalugu, ininik nakkutilliiffiusunik atuinermi sinaakkutissat atugassiissutillu sordiaanerit atortuulersitsinermili naammattumik erseqqissaatigineqarsimanissaat ataatsimiititaliamit pingaartinneqarmat.

Eqqarsartaatsimikkut innarluutillit inissinneqartarnerat katsorsarneqartarnerallu:

Naalakkersuisut aalajangiiffigisassatut siunnersuutaanni ima paasissutissiisoqarpoq:

”Kiisalu pinerluttulerinermi inatsimmi kapitali 33-imi tarnikkut nappaatillit katsorsarneqartarnerannut inissinneqartarnerannullu kina akisussaansoq pillugu maleruagassat allanngortinneqassapput. Eqqarsartaatsikkut innarluutillit pineqartillugit kikkut aningaasaqarnikkut akisussaasuuneri pillugit erseqqissaasoqarnissaa tamatumunnga tunuliaqutaavoq, tassami ulluinnarni isumaginninnermi oqartussaasut pineqaatissiisutunik naammassinninnermik suliarinnittuusarmata tamatumunnga tunuliaqutaavoq.”

”Siunnersuutip akuerineqarneranut atatillugu tarnikkut nappaatillit pillugit eqqartuussinerit naammassineqarnissaasa akilerneqarnissaannut aningaasaliissutit ullumikkut peqqinnissaqarfimmukartinneqartartut eqqarsartaatsimikkut innarluutilinnut atatillugu isumaginninnermut oqartussanut nuunneqartartussanngussapput.”

Aalajangiiffigisassatut siunnersuummut ilanngussaq 1-imi inatsisissatut siunnersuummut nassuiaatini nalinginnaasuni ima paasissutissiisoqarpoq:

”2.5.1. Inatsisit atuuttut

Pinerluttulerinermi inatsimmi kapitali 33-mi tarnimikkut nappaateqartunut pinerluuteqarsimasunut immikkut pineqaatissiinerit pineqarput. Tassani pineqarsinnaapput Kalaallit Nunaanni imaluunniit Danmarkimi napparsimmavimmi imaluunniit paaqqinniffimmi allami inissiineq.

Kapitali 33 malillugu pineqaatissiinerit naammassineqarneri pillugit malittarisassat pinerluttulerinermi inatsimmi § 240-miipput. Tassannga takuneqarsinnaavoq tarnimikkut napparsimasunik pinerluuteqarsimasunik inissiinnermut katsorsaanermullu akisussaaffik peqqinnissaqarfimmiittoq. Tassani pineqarput silamikkut ajoquteqartut aamma inuit tamatumunnga assersuunneqarsinnaasumik atugaqartut, aamma tarnimikkut inortut .

2.5.2. Inatsisinik atuutsitsinermi ministeriaqarfiup eqqarsaatersuutai aaqqissuussinertullu siunnersuutigineqartoq

Kalaallit Nunaanni Eqqartuussivinnut Siunnersuisoqatigiit kaammattuutigisimavaat

pinerluttulerinermi inatsimmi § 240-mi erseqqissarneqassasoq silamikkut ajoquteqartunik imaluunniit inunnik taamatut assersuunneqarsinnaasumik atugaqartunik peqqinnissaqarfimmit naammassineqassasut, tarnimikkulli inortunik inissiineq isumaginnittoqarfimmit naammassineqassasoq.

Tamatumunnga tunuliaqutaasoq tassaavoq Naalakkersuisut ilisimatitsisimasut tarnimikkut inortunik inissiinissamut eqqartuussummik naammassinninnermik isumaginnittuusut tassaasut isumaginnittoqarfik, tassunga ilanngullugu paaqqinniffimmi inissamik tulluurtumik nassaarnissaq. Maannakkut aalajangersakkap ilusilersornerata kingunerisaanik pisuni arlalinnik nalornissutigineqartarsimavoq tassunga aningaasartuutunik akiliisussaq tassaassanersoq peqqinnissaqarfik imaluunniit isumaginnittoqarfik, tassa peqqinnissaqarfik kisimi § 240-mi eqqaaneqarsimammat.

Tamanna tunuliaqutaralugu siunnersuutigineqarpoq pinerluttulerinermi inatsimmit erseqqissumik allassimassasoq silamikkut ajoquteqartunik aamma inunnik tamatumunnga assersuunneqarsinnaasumik atugaqartunik inissiinnermut peqqinnissaqarfik akisussaassasoq, tarnimikkulli inortunik inissiinnermut isumaginnittoqarfik akisussaalluni.”

Ataatsimiititaliap tamanna ima paasivaa, tassa tarnimikkut innarluutilinnik inissiinnermi isumaginnittoqarfiup isumaginnittuusarnera nalinginnaasuusimasoq, taamaalillunilu inatsisit suleriaatsimut atorineqartumut naapertuuttunngortinneqarnerat, aningaasallu suliassamik taassuminnga isumaginninnermut Peqqinnissaqarfimmut immikkoortinneqartarsimasut siunissami inunnik isumaginnittoqarfimmut nuunneqartalernerat allannguummit nassatarineqartoq.

Ataatsimiititaliap inassuteqaatai

Siunnersuut **akuerineqassasoq** ataatsimiititaliap **isumaqatigiittup** inassutigaa.

Inatsisinut Ataatsimiititaliap taama oqaaseqaateqarluni isumaliutissiisummilu
allassimaneratut paasinnilluni siunnersuut aappassaaniigassanngortippaa.



Sofia Geisler
Siulittaasup tullia

Anders Olsen
Siulittaasq



Stine Egede



Aleqa Hammond



Anna Wangenheim